

Caquetio, Africano, Europeo: Nos tur ta un famia

Fonds voor Cultuurparticipatie a aproba proyecto personal

E adulto mayor ta e yabi di e pasado y e porta na e futuro. E pensamiento aki a forma e fundeshi di e proyecto Caquetio, Africano, Europeo: Nos tur ta un famia

E proyecto aki ta e resultado di e disculpa di premier Rutte dia 19 di December 2022 y di e rey Willem Alexander cu a pidi pordon pa e esclavitud transatlantico Hulandes dia 1 di juli 2023. E aña 2023-2024 a wordo declara e aña di Commemoracion di esclavitud Hulandes transatlantico den reino Hulandes. Y Hulanda a duna dos milyon euro pa proyectonan den reino durante di e aña di conmemoracion.

Un milyon euro a bay na Mondriaan Fonds y un milyon euro a bay na Fonds voor Cultuurparticipatie pa nan parti pa proyectonan. Den cuadro di esaki Fonds voor Cultuurparticipatie a aproba e proyecto personal Caquetio, Africano, Europeo: Nos tur ta un famia di life coach y museologo Lilly Marlene Peterson MA y su team. Manera e nomber di e fondo ta informa nos e proyectonan cu wordo aproba mester inclui e participacion di gruponan den comunidad. Sra. Peterson a scoge e adulto mayor di cua su hendenan tabata esclavisa of tabata tin esclavo aki na Aruba como su grupo di enfoko. E ta mira e adulto mayor como e yabi na e pasado y e porta pa e futuro. Y e ta spera di conecta e adulto mayor ainda mas cu su famia.

Sra. Peterson su inspiracion pa e proyecto aki a bin parcialmente di e buki *Ons eilandje* Aruba di Sra. Laura Wernet-Paskel cu a wordo publica den aña 1992. Laura na pagina 38 ta conta nos e siguiente:

“Dat de mensen zich ná de afschaffing van de slavernij toen werkelijk één voelden, blijkt uit hun vrijheidslied met dit Frans getinte refrein: Liberté, égalité Vrijheid, gelijkheid Nos tur ta un. Wij zijn allen één. No tin catibo mas. Er zijn geen slaven meer.”

Den traduccion esaki ta lesa: E cantica di libertad ta

e muestra cu despues di e abolicion di esclavitud hende a sinti nan mes berdaderamente un.

E cantica di libertad ta bisa “Nos tur ta un.” Sra. Peterson kier sa di e grupo di enfoko con a para cu e unificacion cu Laura ta papia di dje. Tambe e kier sa ta ki trabou tin pa haci 160 aña despues di e abolicion di esclavitud. P’esey Sra. Peterson ta puntra e adulto mayor pa yud’e contesta e pregunta si tras di e nomber di e proyecto mester bin un signo di clamacion: Nos tur ta un famia! Of un signo di pregunta: Nos tur ta un famia?

Dicon contesta e pregunta sensitivo aki? Dicon busca informacion di bo pasado? Esey ta bo so por dicidi. Tin hende cu ta bisa laga e pasado den pasado. Cu otro palabranan no kier sa. Tin hende cu no ta worry y tin hende cu si kier sa. Busca informacion en conexion cu bo pasado ta un proceso personal y ta abo so por dicidi si bo kier sa e storia di bo famia en relacion cu esclavitud.

Cu e proyecto aki Sra. Peterson ta ofrece ayudo na e adulto mayor cu kier sa si nan tin ancestro cu tabata esclavisa. Pa yuda cu esaki Sra. Peterson lo laga traha un pelicula di instruccion con pa haya acceso e registro di catibo riba e website di Archivo Nacional Aruba usando bo telefon. Ora bo Subi e website www.coleccion.aw y drenta den e registro di Archivo Nacional Aruba y busca bo informacion. Porta bo a descubri cu bo hendenan tabata esclavisa aki na Aruba. Por ta bo a descubri cu bo hendenan a esclavisa otro hende aki riba nos isla. Por ta bo lo a descubri cu bo hendenan no tabata ni shon ni catibo. Por ta bo descubri cu bo hendenan tabata shon y catibo.

E team lo kier presenta e video instructivo Nos tur ta un famia den e barionan rond di nos isla. Pa haci esaki ta pidi Centro di bario y organisacionnan cu ta traha cu e adulto mayor pa traha hunto cu nos den e realisacion di e proyecto aki. Nos meta ta pa presenta e pelicula den 30 bario. Nos ta spera cu despues di e presentacionnan den bario cu por lo menos 25 persona busca nan infor-

macion riba e website y avisa nos di nan accion. Di nos curason nos ta spera di encursasho hopi mas hende pa mira e importancia di haya sa nan storia en conexion cu esclavitud y comparti nan storia cu nan famia y si por cu e resto di e comunidad.

Den e barionan ta bay tin e posibilidad pa bo por papia cu un team. Si bo kier papia di locual bo a descubri, den e registro di catibo riba e website di Archivo Nacional Aruba, na un manera mas priva Sra. Peterson ta ofrece e posibilidad pa bo por comunica cu su persona via e-mail y WhatsApp. Y si bo kier comparti bo storia cu e publico tin e posibilidad pa bo expresa bo mes via Facebook.

Banda di Fonds Cultuurparticipatie e proyecto aki tin e



apoyo y sosten di Archivo Nacional Aruba y di Stichting Rancho. Nos ta aprecia si nos por haya e sosten di otro hende y organisacion. E articulo aki ta marca e comienso di e proyecto. E proyecto ta tuma luga durante e periodo di un aña cuminsando awe

dia 8 di november 2023 y ta wordo clausura dia 8 di november 2024.

E proyecto a wordo haci posibel door di Fonds voor Cultuurparticipatie. Fonds voor Cultuurparticipatie ta duna sosten na iniciativa cu ta stimula participacion na cultura. Si bo kier pa nos duna un presentacion di e video na bo grupo bo por

tuma contacto cu nos. Ta bay tin e posibilidad pa bo por sigui nos riba Facebook: Nos tur ta un famia. Awe dia 9 di november cu ta World Freedom Day di USA nos ta habri un e-mail adres pa bo esaki ta: nosturtaunfamia@gmail.com